

Englisch babbele iss nit so oofach

Om Sunndaach iss de Schorsch nassgeschwitzt on de Stommdisch kumme, hott sich gleich enn Schnaps bestellt unn hotten sich gradeweechs in de Hals geschitt.

Doo muss was vorgefalle soi, hawwe mir gedenkt unn deshalb hott de Karl gefroocht: No Schorsch, was hosde dann? Trocken erst emol doi Glatz abb, die glänzt joo wie e Speckschwart. Ei iss was bassiert uffem Weech hierher?

Dess kennder awwer glaawe, hott de Schorsch zur Ontwort gewwe und sich mettem Dascheduch iwwer soi Glatz und soi Gesicht gewischt, weil ich mussd ewe schunn englisch schwätze unn doo kimmsde gonz schee ins Schwitze.

Englisch schwätze, du? Ich war gonz baff. Ei wie issen dess kumme, Schorsch? Erzähl doch emol, mir sinn joo gonz gesponnt.

De Schorsch hott sich erst noch e Bier bestellt unn dann erzählt: Kumm ich doch die Fleschgass enunner, doo stiehn vorm Scharfe Eck, no ja, heit isses joo die Kardoffelstubb, enn Monn unn e Fraa newer ihm Audo, hadde e Londkart uff de Kiehlerhaub lieche, hawwe druffgeguckt unn de Kopp geschittelt. Kann ich eich helfe, habb ich die Leit gefroocht, ich kenn mich hier aus. Doo fängt der Monn oo ze babbele, awwer ich habb de erst nit vill verstonne, denn der hott englisch gebabbelt unn wonn babbelt unserooner schunn auswärts. Awwer alser Britsch gesacht hott, doo wusst ich wasser wollt. Also saach ich: Sie wolle tu se Britsch? Come on, ei sit in your Audo änd will schau you se Britsch, ei will sowieso in se Herrsch.

Der Monn hott yes, yes gesacht, die Fraa hott sich uff de Ricksitz gesetzt, ich mich newer de Fahrer unn habbem gezeichnet wie er fahrn soll, die Hauptstroof enuff unn die Owermoostroof enunner zum Moo. Om Moostoo habb ich gesacht: Stopp!, der Monn hotts Audo abgestellt unn mir sinn dann zum Wasser gonge. Hier iss se Britsch, habb ich gesaacht unn habb uff die Ruderbritsch gezeichnet. Verrie Neiß, hott de Monn gesaacht unn ich druff: Nix Neiß, dess iss se Main.

Die Fraa hott de Kopp geschittelt, de Monn hott genickt, hott sich awwer trotzdem umgeguckt, sieht die Opelbrick unn rief: Wonderful, ei kenn sieh se Britsch over se riwwer. Nit nor riwwer, habb ich gesacht, ju kenn dreiv riwwer unn eniwwer.

Die hawwe also jetz Bescheid gewusst wo se hiewolde unn doo hott der Monn noch ebbes gesacht mett sie unn mett ju. Doo habb ich gesacht, nix Sie, ju kenn ruhich ju zu merr saache, ich bin se Schorsch unn enn old Flerschemer. Unn dann sinn die zwaa fortgefahnr.

Vom Erzähle war de Schorsch gonz außer Adem kumme unn hott erst emol enn große Schluck aus soim Bierglas genumme.

De Karl unn ich, mir hawwe nor gestaunt, unn de Karl hott als erstes soi Sprooch widdergefunde: Ei Schorsch, ich wussd joo gar nit dass du englisch babbele konnst, ich bin richdisch stolz uff dich.

Unn ich habb gesaacht: Jetzt, wo mir mett de Franzose unn de Pole unn de Türke in Freundschaft gehe werreds Zeit, dass mir aach so e Partnerschaft mett de Engländer mache. Unn dann, Schorsch, machst du de Fremdeführer ferr die Engländer.

De Schorsch hott mettem Kopp gewackelt. Ich waaß nit. Weil englisch babbele iss nit so oofach unn merr kimmt debei gonz schee ins Schwitze.

Eiern Honnes